

Nos Bandera

Skirbi pa Franklin O. Dijkhoff

Permiti mi presenta via e poema aki na un manera simpel, pero si respeta

E amor grandi cu mi tin pa e bandera di mi isla chikito Aruba tan venera

Un orguyo grandi ta drenta mi alma, mi ser y mi curason

Ora cu mi mire bula den nos shelo elegantemente na tur ocasion

Permiti mi presenta manera e cos ta, e bunitesa sin igual di nos bandera tan stima

E color blou vibrante y fascinante cu cada instante na shelo nos bista e ta ilumina

Ta simbolisa e awa blou cu nos isla chikito rond di dje ta rondona

E streya cora cu su cuater direccionnan tur e cuarenta nacionnan e ta representa

E cuater puntonan di nos costanan cu hunto ta forma e frontera

Tambe ta wordo grandemente simbolisa dor di e streya cora di e bandera

E blanco na e streya ta e refleho vibrante di amor propio cu den nos a encarna

Cu cada Arubiano tin pa su isla simbolisando e sanger cu e indiannan di franse pas a derama

E liñanan horizontal color geel impresionante

Ta simbolisa e luga liber y apart cu Aruba ta situa den nos lama

Sin cu nos ta keda aparta for di e otro isla y pueblonan importante

Cu tambe ta color di nos rikesanan abundante manera tabata e aloe y nos oro tan afama

Nos ta gradecido na Dios na e constancia y e seguridad di nos economia

Cu tambe ta keda refleha den e liñanan geel den nos bandera tur dia

Contento y agradecido tambe na dje nos tur mester ta

Cu trinta aña di nos flamante bandera nos ta recorda

Gran logronan den bida semper a bai cu hopi sacrificio

Pero contento nos ta awe si cu a prevalece e santo juicio

Cu apesar cu nos ta un isla chikito riba e mapa di mundo

Nos por bisa cu orguyo cu nos tin nos himno, nos bandera y tambe nos escudo